

178 об. чтоже творим, но почитаем богатество, злато и сребро. || Бог же сам паче всего почестъ творя человеку, понеже сотвори его по своему образу и по подобию. Злато же и сребро не по своему образу сотворил есть бог, но на потребу и на почестъ человеку, и сам бо распятие пострада за человека, а не за злато, ни за сребро. Како же убогаго безчестна творим, яко по тому же божию образу сотворен есть яко же и богатый. Есть бо се в мире, яко той же человек, преж быв убог, малу трапезу имяше и худы порты ношаше, живяше бо от своего труда и душу имый светлу — и не чтяхут и. По случаю же некогда приближися к велможам и некоторыми насилующими коварствы обогате, и душу си омрачи, и учреди трапезы силны, и одеяния многоценна, и села, и винограды, и чтяхут и поклоняхутся ему омраченного того ради угодиа миродержителя дьявола, не ведуще како есть душа его честна ли, безчестна ли пред богом. Аще ли же некоему богату и чтиму бывшу ото всех, душу же имущу от насильства

а. 179 темну, || некогда же благий бог, милости своея ради восхотев его на покаяние привести, послет нань наказание и отоймет власть его, и упразднит и от насильства, и не будет собраннаго ему от туждих трудов. И пришед во умиление приидет на истинное покаяние, и просветится душа его пред богом, и узревши и в низщете тогда учнут и безчестити, и ругатися ему, вместо еже бы и паче перваго почтити и. Низщета бо есть честнейши богатства тленнаго пред богом, понеже сам господь пребогатый в милостех, волею обнища. Богатый же всяк несть чист пред богом, яко же сам господь рече: «удобие есть велбуду всквозе иглины уши пройти, неже богату во царство божие внийти»,^с понеже бо всяко богатство от властвующих коварств насилем или некими ухищренми много збираемо, от своего же труда много богатства никому же мощно собрати, развие кому господь от земли утворшеся или от плодов земных или ото умножения скота подаст, || яко же Аврааму и Иеву и инем праведником, но не на сокровение же или на величание и на гордость, но того ради, яко прием помилование от бога, и не пощадите же расточити убогим любве ради христовы, а не погибнет во аде, яко богатый он, пред него же враты нищий Лазарь лежаше. О таковых бо Ияков брат господень по плоти написа: «Да хвалит же ся брат смиренный в высоте своей, богатый же в смирении своем, зане яко цвет травный мимо идет. Восиа бо солнце со зноем и усше трава и цвет ея отпаде и благолепие лица ее погибе, тако и богатый в хождении своем увядает. Блажен муж, иже претерпит искушение, яко искушен быв примет венец жизни, иже обеща господь любящим его».† И паки рече: «Не бог ли избра нищая мира, богаты в вере и наследники царствия, иже обеща господь любящим его».‡ Яко же бо сам господь рече учеником своим: «и не глаголю вам, яко аз умолю отца о вас, сам бо отец любит вы, яко вы мене возлюбисте».§ Сие же вся сведый господь рече сего ради, яко святии ученицы его ради пострадажут и человек ради, их же душа спасут, ибо и сии многи пакости сотвориша им, елицы последи пришед в чюство разумеша, яко апостоли хотяще им жизни вечныя и от них же страдаша, свершающе господню заповедь, еже о любви, яко положити душу за други своя. Сии бо не мняху яко бысть древний друг, но мняще яко ныне и враг, но друг будет по вере. Господь бо наказая их, рече: «любите враги ваши, благословите кленущая вы, добро творите ненавидящим вас, молитесь за творящая вам напасть и изгонящая вы, яко да будете сынове отца вашего, иже есть на небесех».× Се бо слово и всем верным

а. 180

^с Матф., 19, 24.

† Иаков, I, 9—13.

‡ Иаков, II, 5.

§ Иоанн, XVI, 26—27.

× Матф., V, 44—45.